



سيارن اخبار
PRESS RELEASE

KEMENTERIAN KESIHATAN • Jalan Menteri Besar, Bandar Seri Begawan BB3910, Negara Brunei Darussalam.
Tel: 2381640 samb./ext. 7734 • Faks/Fax: 2383016 • E-mel/E-mail: prohealth@brunet.bn

SIARAN AKHBAR 

KENYATAAN MEDIA

SITUASI TERKINI JANGKITAN COVID-19 DAN PENGURANGAN LANGKAH-LANGKAH PENJARAKAN SOSIAL YANG DIAMBIL BERIKUTAN SITUASI COVID-19 DI NEGARA BRUNEI DARUSSALAM 15 Muharram 1442 / 03 September 2020

1. Kementerian Kesihatan ingin memaklumkan kepada orang ramai bahawa pada hari ini, Khamis, 15 Muharram 1442H bersamaan 03 September 2020M, **satu kes baru** jangkitan COVID-19 telah disahkan di negara ini yang membawa **jumlah keseluruhan kes COVID-19 di negara ini kepada 145 orang.**
 - **Kes 145** ialah seorang lelaki berumur 33 tahun yang tiba ke negara ini dari Indonesia melalui Kuala Lumpur dengan menaiki penerbangan Diraja Brunei BI 874 (tempat duduk 32H) pada 28 Ogos 2020. Kes ini telah dikesan melalui program saringan ujian swab COVID-19

bagi sesiapa yang baru tiba ke negara ini dari luar negara. Beliau tidak mengalami sebarang tanda-tanda jangkitan dan pada masa ini, dirawat di Pusat Pengasingan Kebangsaan. Pengesanan kontak (*contact tracing*) bagi kes ini telah mengenalpasti 32 orang kontak yang mana kesemuanya telah menjalani ujian swab COVID-19 di mana 26 orang daripadanya telah disahkan negatif manakala selebihnya masih menunggu keputusan ujian tersebut.

2. Sementara itu, 2 kes yang sedang dirawat di Pusat Pengasingan Kebangsaan adalah dalam keadaan baik dan stabil manakala **jumlah kes yang telah sembuh setakat ini ialah seramai 139 orang.**
3. Dalam pada itu, 62 orang sedang menjalani arahan kurantin (*quarantine order*) di pusat-pusat pemantauan yang disediakan oleh Kerajaan juga dalam keadaan sihat dan tidak mempunyai sebarang tanda-tanda jangkitan. Di samping itu, seramai **476** orang sedang menjalani pengasingan diri

mandatori di pusat-pusat pemantauan yang disediakan oleh Kerajaan iaitu mereka yang baru tiba ke negara ini setelah melakukan perjalanan dari luar negara. Setakat ini, seramai **5,147** orang telah menamatkan pengasingan diri mandatori di kemudahan-kemudahan berkenaan.

4. Dalam tempoh 24 jam yang lalu, sebanyak **289 sampel** telah diuji bagi virus SARS-CoV-2 yang membawa jumlah keseluruhan ujian makmal dijalankan sejak Januari 2020 kepada **52,739** ujian.

5. Sementara itu, mengambilkira situasi COVID-19 di Negara Brunei Darussalam yang pada masa ini adalah dalam keadaan yang terkawal, maka pada menjunjung titah perkenan Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam, Kementerian Kesihatan ingin memaklumkan kepada orang ramai mengenai **perubahan** pengurangan langkah-langkah penjarakan sosial yang akan bermula pada **hari Isnin, 07 September 2020** seperti berikut:

- i) Menaikkan aktiviti Pusat kegiatan warga emas dari tahap ketiga (level 3) ke tahap keempat (level 4).
- ii) Menaikkan kapasiti perkumpulan ramai (*mass gathering*) dari 200 orang ke 350 orang yang mana garispanduannya boleh diperolehi di laman web Kementerian Kesihatan.

Keterangan lanjut mengenai pengurangan langkah-langkah penjarakan sosial bagi Tahap 4 Pusat Kegiatan Warga Emas akan dijelaskan oleh Yang Berhormat Menteri Kementerian Kebudayaan, Belia dan Sukan.

Sementara itu, langkah-langkah penjarakan sosial bagi aktiviti-aktiviti lain adalah tidak berubah.

6. Sehubungan dengan ini, Kementerian Kesihatan mengkehendaki orang ramai untuk mematuhi segala peraturan dan arahan yang berkaitan dengan pengurangan

langkah-langkah penjarakan sosial yang telah dikeluarkan dan masih berkuatkuasa pada masa ini.

- i) Dengan ini, orang ramai adalah dikehendaki untuk menggunakan aplikasi BruHealth dan mengimbas kod QR setiap kali apabila masuk dan keluar dari premis-premis terutama sekali di tempat-tempat awam seperti gedung-gedung perniagaan, kedai-kedai runcit, restoran-restoran, establishmen kecantikan, kedai gunting dan lain-lain. Dalam pada itu, bermula hari Isnin, 07 September 2020, pengurus-pengurus premis perniagaan adalah dimestikan untuk memaparkan QR kod di tempat-tempat masuk masing-masing. Orang ramai adalah dinasihatkan untuk mengambil serius penggunaan aplikasi BruHealth terutama sekali dalam mengimbas QR kod ini kerana ia adalah penting dalam membantu Kementerian Kesihatan melaksanakan pengesanan kontak (*contact tracing*) dengan segera, jika berlaku sebarang penularan jangkitan.

- ii) Orang ramai adalah juga dikehendaki untuk mengamalkan tanggungjawab sosial masing-masing dengan mengamalkan kebersihan diri, etika bersin yang betul, digalakkan memakai sungkup muka (*face mask*) apabila berada di tempat-tempat awam yang penuh sesak dan jika merasa kurang sihat, tidak menghadirkan diri ke tempat-tempat awam dan majlis-majlis keramaian. Orang ramai khususnya para jemaah yang menghadiri sembahyang fardhu Jumaat adalah sekali lagi diingatkan bahawa memakai sungkup muka (*face mask*) adalah dimestikan ketika berada di dalam kawasan masjid, sebelum dan selepas mendirikan sembahyang, di samping membawa tikar sejadah sendiri dan mengimbas kod QR apabila memasuki masjid atau surau.
- iii) Sesiapa yang didapati melanggar atau ingkar akan mana-mana arahan yang telah dikeluarkan semasa pandemik COVID-19 ini maka ianya adalah menjadi satu kesalahan di bawah Akta Penyakit Berjangkit (Penggalt 204) yang mana jika didapati bersalah boleh dikenakan

denda kompaun sehingga \$5,000 atau boleh didakwa ke mahkamah yang membawa denda sehingga \$10,000 atau penjara sehingga tempoh 6 bulan atau kedua-duanya sekali. Kementerian ini tidak akan teragak-agak untuk mengambil tindakan undang-undang terhadap sesiapa yang tidak mematuhi arahan-arahan yang telah dikeluarkan.

7. Sejak tindakan undang-undang mula dikuatkuasakan bagi arahan-arahan yang telah dikeluarkan semasa pandemik COVID-19 ini pada bulan Jun 2020 yang lalu hingga sekarang, sebanyak **636** premis perniagaan telah diperiksa di seluruh negara di mana **517** kesalahan telah didapati dan dikenakan denda kompaun. Di antara kesalahan-kesalahan yang sering dilakukan ialah pengendali makanan tidak memakai sungkup muka semasa berkerja dan premis tidak melakukan pemeriksaan suhu badan terhadap pelanggan atau pengunjung.

8. Kementerian Kesihatan akan terus memantau situasi wabak di dalam negara serta di peringkat serantau dan global serta melaksanakan penilaian risiko secara berterusan bagi mempertimbangkan pengurangan langkah-langkah seterusnya. Jika situasi wabak kembali membimbangkan, Kementerian Kesihatan tidak akan teragak-agak untuk memperketatkan semula langkah-langkah penjarakan sosial yang perlu dilaksanakan untuk mengawal wabak tersebut. Kementerian Kesihatan akan memaklumkan kepada orang ramai mengenai sebarang perubahan mengenai situasi ini, jika perlu dari masa ke masa.

9. Untuk maklumat lanjut dan perkembangan terkini, orang ramai boleh melayari laman web Kementerian Kesihatan iaitu **www.moh.gov.bn** atau menghubungi **Talian Nasihat Kesihatan 148** atau melalui aplikasi **healthinfo.gov.bn**.

- **TAMAT** -

Rujukan : KK/PR/2

Tarikh : 15 Muharram 1442H / 03 September 2020